


Proyecto grandi di Gabinete Mike Eman II

E siman aki inicio di construcccion hospital nobo

Efecto economico grandi pa Aruba



RENOBACION, ampliacion y modernisacion di dr. Horacio Oduber Hospital a haya un otro dimension na momento cu luna pasa Gobierno di Aruba, SOGA, AIB, OHL-Arellano y HOH a firma e contract pa ehecucion di e trabounan cu ta start e siman aki. E siman aki ta habri cu inicio di e proyecto mas grandi den su sorto na Aruba. Diaranson awor, dia 28 di mei, ta pone e prome piedra pa loke ta e trabou di ta renobacion, modernisacion y ampliacion di dr. Horacio Oduber Hospital. Un trabou inmenso ta bay wordo haci den

e periodo di 4 aña y mey. Esaki ta encera un boost grandi pa economia di Aruba, teniendo na cuenta cu pa por cumpli cu e trabou aki durante e añanan nos dilanti mester di un hopi obrero y otro empleadonan. Contratista OHL-Arellano, cu ta e contratista principal, a acorda cu gobierno di Aruba cu e ta traha cu subcontratistanan local so y tambe ta haci mas tanto posibel uzo di hendenan local pa ehecuta e trabounan. Pa esaki OHL-Arellano ta habri un webportal. Esaki ta un forma nobo di atrae hende pa traha.

Tur hende por bay riba e webportal y wak ki sorto di ofishi mester y por aplica pa e trabou e ora. Pa e periodo di construcccion di Fase IA, Fase IB y Fase II cu ta bay dura mas o menos 4 aña y mey lo tin mester di 200 pa 250 empleado extra. Den e plannan diseña pa Buro di arkitekto Bermello, Ajamil and Partners a tene cuenta cu tur deseo di personal di HOH. Nan a wordo scucha y tabatin nan input. AIB y SOGA (Stichting Onroerend Goed Aruba) a percura pa financiamiento di e proyecto grandi aki. Despues

cu e trabou keda cla SOGA ta lease e edificio cu gobierno cu na su turno ta dun'e den uzo na hospital. E proyecto inmenso aki ta conta cu un bon acogida den pueblo. Tur hende ta realisa cu despues di casi 40 aña, e tempo a yega pa hospital amplia y bira mas moderno pa e por keda brinda bon servicio na comunidad di Aruba. Luna pasa, na momento cu a firma e contract cu partidonan envolvi, Prome Minister Mike Eman a bisa cu no solamente ta bay construi un miho hospital pa Aruba, pero cu ta pone

tambe un base fuerte pa e vision di un miho calidad di bida pa nos hendenan. Aruba por ta orguyoso di su hospital y servicio medico, sigur si compar'e cu e region. "Pero e facilidadnan no ta di e calidad cu nos lo kier pa nos hendenan. Ta durante e momentonan cu bo ta den un situacion dificil y bo experiencia cierto cosnan, cu bo ta bira consciente y haci bo mes e promesa pa cambia cosnan cu no ta loke sociedad merece". Eman y gobierno d Aruba a cumpli cu nan promesa. Sociedad ta bay haya e hospital cu e merece.